

SCHOTTEDICHTER



Fasnacht 2024

GÄLL, DU KASCH DAS NIT?

Wottschi di z'Prattele nid blamiere,
sprich ändlig chönne richtig intrigiere,
schickt di unser bescheides Komitee,
uf Basel zum Instruktor - ohJemineh.

In dr grosse Stadt gits nid nur für Cheese-Pfyffe,
nei au für Waagis no Profis, wo di richtig schlyffe,
nach 3 Daag Training sitzt e Jede Ton -
und d'Rechnig schiggsch direkt em Lüdi-Gloon.

Dr Wage-IG Lehrer meint - do wird nid glacht,
ich zeig euch jetzt wie me Fasnacht macht,
als Erschts heisst's Rappli statt Konfetti
und e Umzug isch e Goorteesch - goppeletti.

D'Orange wirfsch nid wahloos in d'Lüt
und ohni Blaggedde git's erscht racht denn nüt,
so chönnt me sich z'Prattele Jo bim fahre,
grad d'Halfti vom Material no beschtens spaare.

JETZT MUESCH DIE DAFELE UMDREYE...

Die glatte Spruch ab em Waage – s'isch woher,
flüschtered dir diraggt dr Minu no lau ins Ohr,
unterwägs froggt sich jedi Rambasse-Pflute,
bin i Jetzt uf dr innere oder üssere Route?

Doch au nab de Waage gits nid viel z'lache,
me müesst überall Verbessrige mache,
statt in Kölner-Karneval-Montur,
griesst me's schwarz-kleidete Komitee no stur
oder falls dene Prattler Könige das nid verleidet,
sin si als Dummpeter und Co. au guet verchleidet.

In Sache Hilf anne bim luschtig sy,
sin d'Schoreniggeli au voll drby,
für e bitz Larifari spanne sy mit de Lümmel zämme,
guet me weiss Jo, dass dia Buure au alles nämme –
aber das wird leider gar kei Hit,
will Minus mol Minus halt nid immer Plus ergit
und schaad wird z'Basel kei FÜR entfacht,
wer zeigt de Biiger Jetzt wie mes richtig macht?

Me cha au witer philosophiere,
mit wam cha me denn do überhaupt no intrigiere?
denn am and schafft me bis z'Obe spoot,
Jo mit dam wo am Strooserand ume stoht,
denn Jedem Zweite muesch in Prattler Sphäre,
d'Fasnacht grundsätzlich no erkläre.

PS: Au de Zeedel do chunnt nid vo uns allei,
nei ghulfe het dr Schorsch vom Haafebeggi 2,
aso chönne mir ganz ohni künstlichi Intelligenze,
an dr Prattler Fasnacht witer zünde und au glanze.